

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U VISOKOM  
Broj: 41 0 K 095277 23 K  
Visoko, 18.04.2023. godine

## U IME FEDERACIJE BOSNE I HERCEGOVINE

Općinski sud u Visokom, sudija A.S., uz sudjelovanje zapisničara E.M., u krivičnom predmetu protiv optuženog R.K., zbog krivičnog djela Nasilje u porodici iz člana 222. stav 2. u vezi sa stavom 1. i u vezi sa članom 55. KZ FBiH, rješavajući po optužnici Kantonalnog tužilaštva Zeničko-dobojskog kantona broj: T04 0 KT 0050005 22 od 16.11.2022. godine, na glavnom pretresu održanog dana 18.04.2023.godine u prisustvu Kantonalne tužiteljice R.B. i optuženog R.K., dana 18.04.2023. godine, donio je i javno objavio:

## P R E S U D U

OPTUŽENI: R.K., sin H. i majke M. rođ. A., rođen ..... godine u B., nastanjen u ulici M. R. broj 35, općina B., pismen, sa završenom osnovnom školom, po zanimanju NK radnik, nezaposlen, neoženjen, vojsku služio u Postojni R.S. 1988/89 godine, vodi se u vojnoj evidenciji OMO B., srednjeg imovnog stanja, po narodnosti ....., državljanin BiH, kažnjavan, osuđivan,

## K r i v j e

Što je:

1.dana 31.07.2022.godine, oko 13,00 sati, na području općine B., ispred porodične kuće na adresi M. R. 35, drskim i bezobzirnim ponašanjem ugrozio mir i psihičko zdravlje člana svoje porodice, sestre R. S., sa kojom živi u zajedničkom domaćinstvu, a nakon što se doveo u alkoholisano stanje, došao kući, te počeo verbalno vrijeđati Senadu riječima „da je kurva, kurvetina, da će je istjerati iz kuće, da nije normalna“, da bi potom uzeo pvc kantu od „jupola“ i istom S. zadao udarac u predjelu lijeve ruke, iako je bio svjestan da takvim svojim ponašanjem ugrožava mir i psihičko zdravlje člana svoje porodice, što je i htio, usljed čega je ista zadobila povrede lijeve šake konstatovane u nalazima JU Doma zdravlja B. od 31.07. 2022.godine i 02.08.2022.godine, na koji način je prekršio i zaštitne mjere udaljenja iz kuće i zabranu vraćanja u naznačenu kuću, te zaštitnu mjeru zabrane približavanja žrtvi nasilja R. S., koje su izrečene u trajanju od 12 mjeseci, Rješenjem Općinskog suda u Visokom broj 41 0 Pr 092277 22 Pr od 16.03.2022.godine,

2. dana 08.10.2022.godine, oko 14,00 sati, na području općine B., u porodičnoj kući na adresi M. R. 35, drskim i bezobzirnim ponašanjem ugrozio mir i psihičko zdravlje člana svoje porodice, sestre R. S., sa kojom živi u zajedničkom domaćinstvu, a nakon što se doveo u alkoholisano stanje, verbalno vrijeđao sestru S. riječima „da je kurva, da će je istjerati iz kuće, da nije normalna“, iako je bio svjestan da takvim

svojim ponašanjem ugrožava mir i psihičko zdravlje člana svoje porodice, što je i htio, koje ponašanje negativno utječe na zdravlje S., na koji način je prekršio i zaštitne mjere udaljenja iz kuće i zabranu vraćanja u naznačenu kuću, te zaštitnu mjeru zabrane približavanja žrtvi nasilja R.S., sve izrečene u trajanju od 12 mjeseci na temelju Rješenja Općinskog suda u Visokom broj 41 0 Pr 092277 22 Pr od 16.03.2022.godine,

dakle, drskim i bezobzirnim ponašanjem ugrozio, tjelesnu cjelovitost, mir i psihičko zdravlje člana svoje porodice, sa kojim živi u zajedničkom domaćinstvu,

čime je počinio produženo krivično djelo Nasilje u porodici iz člana 222. stav 2., u vezi sa stavom 1. i u vezi sa članom 55. KZ F BiH.

Pa mu sud na osnovu člana 43. KZ FBiH, i z r i č e:

### KAZNU ZATVORA U TRAJANJU OD 5 (PET ) MJESECI

Na osnovu člana 202. stav 4. Zakona o krivičnom postupku Federacije Bosne i Hercegovine, optuženi se oslobađa plaćanja troškova postupka i isti padaju na teret budžeta.

#### O b r a z l o ž e n j e

Kantonalno tužilaštvo Zeničko – dobojskog kantona optužnicom broj: T04 0 KT 0050005 22 od 16.11.2022. godine, a koja je zaprimljena kod ovog suda dana 18.11.2022.godine, optužilo je R.K., da je počinio krivično djelo Nasilje u porodici iz člana 222. stav 2. u vezi sa stavom 1. i u vezi sa članom 55. KZ FBiH.

Optužnica broj: T04 0 KT 0050005 22 od 16.11.2022. godine je potvrđena od strane sudije za prethodno saslušanje ovog suda dana 21.11.2022. godine i na ročištu za izjašnjenje o krivnji, održanog dana 23.02.2023. godine optuženi R.K. se izjasnio da nije kriv za krivično dijelo koje mu se stavlja na teret.

Na glavnom pretresu održanog dana 18.04.2023.godine, optuženi je promjenio svoj iskaz i izjasnio se da je kriv za krivično djelo Nasilje u porodici iz člana 222. stav 2. u vezi sa stavom 1. i u vezi sa članom 55. KZ FBiH.

Radi provjere priznanja, sud je izvršio uvid u materijalne dokaze optužbe i to: Zapisnici PS B. o ispitivanju osumnjičenog R.K. broj: 08-02-09/3-2-235/22 od 01.08.2022.godine i broj: 08-02-09/3-2-323/22 od 08.10.2022.godine, Zapisnici PS B. o saslušanju svjedoka-oštećene R.S. broj: 08-02-09/3-2-233/22 od 31.07.2022.godine i broj: 08-02-09/3-2-325/22 od 10.10.2022.godine, te ovog Tužilaštva broj gornji od 15.09.2022.godine, Rješenje Općinskog suda u Visokom broj 41 0 Pr 092277 22 Pr od 16.03.2022.godine; Nalaz i mišljenje ljekara specijaliste Hitne medicinske pomoći Doma zdravlja B. od 31.07.2022.godine; Nalaz i mišljenje ljekara specijaliste JU Doma zdravlja B. od 02.08.2022.godine; Test na alkohol na ime osumnjičenog R.K. od 31.07.2022.godine i 08.10.2022.godine; Izvodi iz kaznene evidencije za osumnjičenog R.K. PS B.. od 01.08.2022.godine i 11.10.2022.godine.

Na osnovu Zapisnika o saslušanju svjedoka R.S. PS B.. broj: 08-02-09/3-2-233/22 od 31.07.2022.godine, Zapisnika o saslušanju svjedoka R.S. PS B. broj: 08-02-09/3-2-325/22 od 10.10.2022.godine, Nalaz i mišljenje ljekara specijaliste Hitne medicinske pomoći Doma zdravlja B. od 31.07.2022.godine; Nalaz i mišljenje ljekara specijaliste JU Doma zdravlja B. od 02.08.2022.godine; Test na alkohol na ime osumnjičenog R.K. od 31.07.2022.godine i 08.10.2022.godine, kao ipriznanje optuženog R.K., sud je sa sigurnošću utvrdio da je optuženi počinio krivično djelo Nasilje u porodici iz člana 222. stav 2. u vezi sa stavom 1. i u vezi sa članom 55. KZ FBiH, na način vrijeme i mjesto pobliže opisano u izreci presude.

Sud je utvrdio da je optuženi navedeno krivično djelo počinio sa direktnim umišljajem jer je bio svjestan svoga djela i htio njegovo izvršenje i da je prilikom izvršenja krivičnog djela bio uračunljivi jer predloženim dokazima nije dovedena u sumnju mogućnost optuženog da shvati značaj svoga djela i da upravljaju svojim postupcima u vrijeme izvršenja djela.

Prilikom izricanja krivičnopravne sankcije sud je, kao olakšavajuće okolnosti na strani optuženog cijenio činjenicu da je optuženi priznao izvršenje krivičnog djela koje mu se stavlja na teret čime je doprinio utvrđivanju činjeničnog stanja i skraćenju krivičnog postupka te materijalne i porodične prilike optuženog, njegovo kajanje kao i volju za lječenje od ovisnosti od alkohola.

Od otežavajućih okolnosti na strani okrivljenog sud je cijenio činjenicu da je isti osuđivan za krivično djelo Nasilje u porodici iz člana 222.stav 2. KZ FBiH.

Na osnovu navedenog sud je odlučio da optuženom izrekne kaznu zatvora u trajanju od 5 ( pet ) mjeseci i uvjerenja je da će se ostvariti svrha kažnjavanja i postići ciljevi opšte i specijalne prevencije, i da će preventivno djelovati na optuženog da ubuduće ne čine nova krivična djela.

Na osnovu člana 202. stav 4. Zakona o krivičnom postupku Federacije Bosne i Hercegovine, optuženi se oslobađa plaćanja troškova postupka I isti padaju na teret budžeta.

S U D I J A  
A.S.

POUKA: Protiv ove presude dozvoljena je žalba Kantonalnom sudu u Zenici, putem ovog suda, u roku od 15 dana od prijema presude. Žalba se dostavlja u 3 ( tri ) primjerka za sud i stranke u postupku.